

ENISA BAJRAKTAREVIĆ

IN MEMORIAM

Akademik Senahid Halilović

Senahid Halilović rođen je 22. marta 1958. godine u Tuholju kod Kladnja. Osnovnu školu završio je u rodnom mjestu 1971. a gimnazijsko obrazovanje stekao je u Kladnju. Studirao je na Pedagoškoj akademiji u Tuzli, a poslije stjecanja više stručne spreme nastavio je studij na Filološkom fakultetu Univerziteta u Beogradu, gdje je i diplomirao na grupi za srpskohrvatski jezik i jugoslovenske književnosti 1980. godine. Na Filološkom fakultetu Univerziteta u Beogradu S. Halilović pohađao je i postdiplomski studij iz lingvistike i okončao ga odbranom magistarskog rada *Govor Muslimana Tuholja (okolina Kladnja)* 1985. godine. Pet godina kasnije, na istom fakultetu, odbranio je i doktorsku disertaciju pod nazivom *Hercegovački govorni tipovi u međuriječju Neretve i Dubrovačke rijeke*.

Po završetku dodiplomskog studija, radio je kao profesor maternjeg jezika u kladanjskoj Gimnaziji. Poslije je, vrlo kratko, radio u Radio-Brčkom, da bi 1982. godine bio primljen u stalni radni odnos u Institut za jezik u Sarajevu. U Institutu su u pravom smislu riječi došli do izražaja radni i stručni kvaliteti S. Halilovića. U zvanje *naučnog saradnika* izabran je 1990. godine. Rat i agresija prekinuli su njegov rad i napredovanje u Institutu. Početkom školske 1992/1993. godine biran je u zvanje *docenta* na predmetu *Dijalektologija* na Filozofskom fakultetu u Sarajevu kao spoljni saradnik. Na Fakultet je prešao početkom 1994. godine. Godine 1996. napredovao je u zvanje *vanrednog profesora*, a 2003. u zvanje *redovnog profesora*. Bio je član *Kolegija postdiplomskog studija iz lingvistike*, *Kolegija doktorskog studija iz lingvistike* i član *Kolegija doktorskog studija iz lingvističke bosnistike*. Godine 2018. izabran je u članstvo Akademije nauka i umjetnosti BiH a

2021. godine *Slavistički komitet BiH* dodijelio mu je nagradu *Povelja bana Kulina* za izuzetan doprinos slavistici. Godine 2022. dobio je nagradu Univerziteta u Sarajevu za poseban doprinos nauci.

Ugled S. Halilovića kao stručnjaka i naučnika rastao je s njegovim razvojem i napredovanjem jer je to napredovanje pratilo ne samo proširivanje njegovog interesovanja za jezičku problematiku izvan okvira dijalektologije nego i novi stavovi i doprinos sagledavanju nekih pitanja iz domena prirode standardnih jezika nacionalno nehomogenih zajednica, te angažiranje na rješavanju najaktuelnijih potreba jezičke prakse. Ovo se prije svega odnosi na viđenje bosanskog jezika kao jednog od standardiziranih idioma štokavskog narječja i rad na normativnim priručnicima – od pravopisa do gramatike i rječnika, ali i na onim koji se tiču njegove kultivacije – karakteru jezičkih savjetnika. Bez straha da će se pogriješiti, može se reći da je S. Halilović devedesetih godina, a to će reći i najpresudnijih, ako ne i najznačajnijih godina, dao najveći doprinos afirmaciji bosanskog jezika. O tome će trajno svjedočiti radovi koje je napisao, ali u tome se ne iscrpljuje njegov doprinos. On je nemjerljiv u onome što se vremenom zaboravi – u nizu predavanja o tom jeziku – nastavnicima, kulturnim i društvenim djelatnicima, naučnicima, kako u zemlji tako i u inostranstvu, zatim u organizaciji naučnih skupova koji su značajno doprinijeli pozicioniranju lingvističke bosnistike u svjetskim okvirima.

Bibliografiju akademika S. Halilovića čini preko stotinu naučnih i stručnih priloga, među kojima je trinaest knjiga – osam autorskih i pet koautorskih.

Bio je i jeste najutjecajniji i najpoznatiji bosanski lingvist: svojim knjigama, radovima, projektima, predavanjima u zemlji i inostranstvu – svojom ukupnom naučnom i stručnom aktivnošću – od devedesetih godina do danas dao je najveći doprinos afirmaciji bosanskog jezika i razvoju bosnistike. Njegovo naučno pregnuće i životni put prekinuti su u aprilu 2023. godine, upravo nakon što je dovršio djelo *Bosanskohercegovački govori krajem XIX stoljeća*, koje je smatrao jednim od svojih najvećih naučnih ostvarenja, ako ne i najveće. Njegovim preranim odlaskom akademska zajednica u BiH pretrpjela je nenadoknadiv gubitak.

Osim nemjerljivog doprinosa bosnistici i lingvistici uopće Senahid Halilović ostat će upamćen kao čovjek koji u svojim profesionalnim aktivnostima nikad nije zanemario da su ljudi najvredniji resurs, te je u svojim relacijama širio optimizam, otvorenost, toplinu, spremnost da pomogne, sasluša, da pronade rješenje ondje gdje se ne nazire, ali i da uputi konstruktivnu kritiku, ne ugrožavajući pritom ljudsko dostojanstvo. Svojim pristupom je odgajao, a riječima i djelima poučavao. Plod njegovog rada i djelovanja ostao je zasijan u brojnim generacijama studenata i studentica, saradnika i saradnica, kolega i kolegica, u njima raste i razvija se, čime postojanje i djelovanje Senahida Halilovića ne prestaje.